

PLKN: Kerajaan Belanja RM4.7 Bilion
mStar Online
Oktober 12, 2011
Oleh ARIFFUDDIN ISHAK

KUALA LUMPUR: Program Latihan Khidmat Negara (PLKN) telah menelan belanja sebanyak RM4.7 bilion sejak ia ditubuhkan pada 2004 sehingga 31 Ogos tahun ini.

Timbalan Menteri Pertahanan, Datuk Dr Abdul Latiff Ahmad berkata, program berkenaan berjaya memberi kesedaran kepada pelatih terutama bagi membentuk jati diri menerusi imej dan pelakuan positif.

Menurut beliau modul latihan PLKN juga secara tidak langsung berjaya menghindari golongan remaja daripada mudah terlibat dengan kegiatan jenayah.

"Walaupun kementerian ini tidak mempunyai statistik remaja yang pernah menyertai PLKN tetapi masih terlibat dalam kes jenayah, namun kementerian yakin remaja yang menjalani PLKN mampu menjadi remaja yang mempunyai jati diri kukuh," katanya pada sesi soal jawab lisan di Dewan Rakyat, di sini, Rabu.

Beliau menjawab soalan Amran Abdul Ghani (PKR-Tanah Merah) yang ingin mengetahui kejayaan pencapaian PLKN dalam memberi kesedaran awal kepada remaja.

Selain itu menurut Abdul Latiff, peserta yang menyertai program PLKN didapati berjaya mengawal diri daripada terjebak dengan kes jenayah berdasarkan peningkatan pendaftaran pelatih dalam Pasukan Sukarela dari tahun ke tahun.

"Kajian-kajian yang dilaksanakan antaranya berkaitan keberkesanan PLKN bersama kumpulan penyelidik Universiti Kebangsaan Malaysia (UKM) di mana hasil kajian menunjukkan maklum balas yang positif melebihi 80 peratus terhadap semua komponen yang dinilai iaitu semangat patriotisme, perpaduan kaum, semangat kesukarelaan, berperwatakan positif dan pembentukan remaja yang cergas," katanya.

Hakcipta Terpelihara © 1995-2011 Star Publications (Malaysia) Bhd

Source:

http://mstar.com.my/berita/cerita.asp?file=/2011/10/12/mstar_berita/20111012163353&ec=mstar_berita